

**Láhkaásahus Finnmárkku šládjes lastavuvddiid suodjalanplána birra.  
Trollfjordalen/Gulgo álbmotmeahci suodjaleapmi Bearalvági gielddas,  
Finnmárkku fylkkas.**

Mearriduvvon Gonagasa geassemánu 29. b. 2007-mannosaš resolušuvnnain, geassemánu 19. b. 1970-mannosaš lága nr. 63 vuodul luonddugáhttema birra 8. paragrafas, gč. § 10 ja §§ 21, 22 ja 23. Birasgáhttendepartemeanta lea dan ovddidan.

**§ 1. Ráddjejuvvi**

Álbmotmeahcci guoská čuovvovaš dállo nr./doallo nr. Bearalvági gielddas: 4/1, 14/1, 15/1, 15/3, 15/6, 15/7, 15/8, 15/9, 15/10, 15/11.

Álbmotmeahcci gokčá su. 11 251 dekára sturrosaš areála.

Álbmotmeahci rájit bohtet ovdan Birasgáhttendepartemeantta kárttas mii lea beaiváduvvon geassemánus 2007 ja man mihttolávva lea 1: 40 000. Álbmotmeahci dárkilis rájit galget merkejuvvot eatnamii. Čiegat merkejuvvojit koordináhtaiguin.

Suodjalanláhkaásahus oktan kárttain galgá vurkkoduvvot Bearalvági gielddas, Finnmárkku fylkkamánni luhtte, Luondduhálddašandirektoráhtas ja Birasgáhttendepartemeanttas.

**§ 2 Ulbmil**

Suodjaleami ulbmil lea sealluhit measta lihkatkeahces lastavuovdeguovllu ekovuogádahkan oktan buot lunddolaš šattodagain ja ealliiguin. Erenoamáš kvalitehtat leat johkagáddešattodat earret eará Polarvalmuain (Papaver dahlianum:in). Guovlu lea dieđalaččat mávssolaš davvi soahkevuvddiid šládjaguovlun mas leat uhccán máttášlájat. Dát áidnalunddot guovlu Várnjarggas lea erenoamáš šattolaš.

Álbmotmeahci luondduvuddosa dikšun lea dehálaš sámi kultur- ja ealahusávkkástallamii. Guovllu galgá sáhttit geavahit boazodollui.

**§ 3 Suodjalanmearrádušat**

Álbmotmeahccái gustojit čuovvovaš mearrádušat:

1. Šattodat, dás maiddá jápman muorat ja miestagat, galget suodjaluvvot buot vahágahttima ja bilideami vuostá. Luonddumeahcis ii leat lohpi váldit šattuid dahje šaddoosiid. Ođđa šaddošlájaid gilvin ja buktin dohko eatnamii ja sáivačáhcai lea gildojuvvon.
2. Eallit, dás maiddá beasit ja biejut, leat ráfáiduhthtojuvvon vahágahttima, bilideami ja dárbbasmeahhtun ráfehuhttima vuostá. Ealliid ii leat lohpi buktit dohko ja luoitit daid dohko eallit.
3. Dakkár doaibmajuid ii galgga čađahit, mat rievdadit luonddubirrasa, numo hukset visttiid ja rusttegiid, áidut ja hukset eará gitta ja gaskaboddasáš ráhkanusaid, guođdit kámpenvávnnaid, bráhkáid jed, fatnasiid giddet boijjaide dahje guođdit gáddái, bidjat eatnanbajábeallásaš jodđasiid, eanajodđasiid ja

duolvačáhcebohciid, hukset geainnuid, roggat goivvohagaid ja eara láhkai goikadit eatnamiid, váldit, deavdit ja vurket mássa, luoitit kloáhka dahje eará čeahkáiduvvan nuoskkidanávdnasiid, guođđit doabbariid, duktet, kálket ja geavahit kemikálaid luottahuhttinávnnasin. Nuoskkideapmi lea gildojuvvon. Logahallan ii leat dievas.

4. Mohtorjohtolat eatnamis ja čázis, dás maiddái áibmofievrru girdileapmi ja seaivun, lea gildojuvvon.
5. Álbmotmeahci geavahit lávvo- ja tealtaleairraide, valáštallanlágidemiide dahje eará stuorra lágidemiide lea gildojuvvon.
6. Luondduhálddašandirektoráhta sáhtá vuhtiiválddidettiin ráfáiduhttinulbmila lánkaásahusain gielddit dahje muddet johtolaga oppa álbmotmeahcis dahje dan osiin.

#### § 4 *Oppalaš spiehkastagat*

3. § mearrádusat eai hehte:

1. Militeara operatiiva doaimmaid dahje politiija-, gádjun-, ambulánsa-, buollinsuodjalus- ja bearráigeahččandoaimmaid, ja dakkár dikšun- ja hálddašandoaimmaid čađaheami, maid hálddašaneiseváldi lea mearridan. Hárjehallanvuodjin namuhuvvon doaimmaid oktavuodas gáibida sierra lobi.

3. § nr. 1-3 mearrádusat eai hehte:

2. Geavaheames guovllu guohtumii.
3. Geavaheames goikeovssiid káfedollii.
4. Čoaggimis murjiid ja borramušguobbariid.
5. Bivdima ja gárduma fuođđolága vuodul ja guolásteami luossa- ja sáivaguolástanlága vuodul.
6. Čorgemis bálgáid.
7. Dárbblaš mohtorjohtolaga buohcci ja lápmašuvvan šibihiid viežžama oktavuodas. Dat fievru mii geavahuvvo, ii galgga olus golladit luonddu. Ovdalgo vuodjá galgá dieđihit bearráigeahččui.
8. Ávnnasteami duoji várás.

3. § nr. 1-4 mearrádusat eai hehte:

9. Vuodjimis muohtaskuhteriin dárbbu mielde boazodoalu oktavuodas.
10. Vuodjimis muohtaskuhteriin dohkkehuvvon muohtaskuhterláhtu mielde. Álbmotmeahcis ii leat lohpi earránit skuhterláhtus.

#### § 5 *Vejolaš spiehkastagat ohcama vuodul*

Hálddašaneiseváldi sáhtá ohcama vuodul addit lobi:

1. Čuohppat sogiid iežas atnui.
2. Hukset šalddiid ja roviid, cegget galbbaid ja merket bálgáid.
3. Geavahit mohtorfievrru dárbbu mielde dálvesiivun muoraid geasehit.
4. Johtalit mohtorfievrruiguin dárbbu mielde bievlan boazodoalu oktavuodas.
5. Geasehit mohtorfievrruin dárbbu mielde báhččojuvvon ealgga.
6. Johtalit mohtorfievrruiguin dárbbu mielde hárjehallanvuodjima oktavuodas dakkár áigumušaiguin, mat leat namuhuvvon 4. § 1. čuoggás.

Boazodoalu várás láhččojuvvo vejolašvuohta oažžut mánggajagáš lobiid, mat boazodoalus galget oktiordnejuvvot ja válđojuvvot mielde orohatplánii boazodoallolága vuodul, nu ahte ealáhusain sáhtta bargat dohkálaš vuogi mielde.

#### **§ 6** *Oppalaš sierralohpemearrádušat*

Hálddašaneiseváldi sáhtta spiehkastit láhkaásahusas go suodjaleami ulbmil dan gáibida, ja dieđalaš iskkademiid oktavuodas, servodahkii mearkkašahti mávssolaš bargguid oktavuodas dahje erenoamáš dilálašvuodaid oktavuodas go dat eai rihko suodjaleami ulbmila.

#### **§ 7** *Dikšun ja hálddašanplána*

Hálddašaneiseváldi, dahje dat geasa hálddašaneiseváldi fápmuda válldi, sáhtta čađahit dikšundoaimbajuid maiguin ollašuhtta suodjaleami ulbmila. Sáhtta ráhkaduvvot hálddašanplána mas sáhttet leat dárkilet njuolggadusat dikšuma várás.

#### **§ 8** *Hálddašaneiseváldi*

Luondduhálddašandirektoráhta mearrida geas galgá leat hálddašanváldi dán láhkaásahusa vuodul. Sámi beroštusat galget fuolahuvvot dan hálddašanortnegis mii ásahuvvo.

#### **§ 9** *Fápmuiboahhtin*

Dát láhkaásahus boahhtá fápmui dálán.